

ները համարձակ մտնում են մարդկանց տները եւ մօր գրկից յափշտակում են երեխային...

Յիշեալ դժբախտութիւններից յետոյ վրայ են հասնում բնութեան սասանութիւնները: 1641 թին պատահում է Ատրպատականի մեծ երկրաշարժը: Թաւրիզը, այդ մեծափարթամ քաղաքը, իր փառաւոր շինածքներով ծածկւում է աւերակների կոյտի ներքոյ: Կործանւում է պարսից արքաների հրաշալի պալատը՝ Շամկազանը:

Ատրպատականի երկրաշարժից ուղիղ հինգ տարի յետոյ (1646 թ.) պատահում է Վասպուրականի մեծ երկրաշարժը, որ տեսում է եօթ օր: Լեռներն անգամ կործանւում են նրա սոսկալի հարձակներից: Յոգոց վանքի մօտ Աբեղներ կոչոած սարը փոկ է գալիս, լցնում է ահագին ձորը եւ խափանում է նոյն ձորի միջով անցնող գետի ընթացքը: Վան քաղաքը իսպառ աւերակ է դառնում, տապալում են եւ Շամիրամի բերդի հզօր աշտարակները: Վանայ մէջ եւ նրա շրջակայքում, կա՛մ բոլորովին կա՛մ կիսով չափ, կործանւում են հետեւեալ վանքերն ու եկեղեցիները. Վերին Վարագը, Ներքին Վարագը, Թողիկ ճգնաւորի եկեղեցին, Սալնապատի վանքը, Շուշանից վանքը, Ղուռուբաշի վանքը, Յոգոց վանքը, Էրեմիրայ վանքը, Սրիու վանքը, Բերդակու վանքը, Կենդանանից վանքը, Կռնկու վանքը, Անգուսներու վանքը, Ալերու վանքը, Արշական վանքը, եւ Վան քաղաքի մէջ գտնած Ս. Խաչ, Ս. Աստոածածին, Ս. Սիոն, Ս. Նշան եկեղեցիները:

Բնութեան սասանմունքները մի կողմից, բռնակալների գազանութիւնը միւս կողքից, եւ աւելանալով դրանց վրայ սովը, ժանտախտը, այդ բոլոր աղետաւոր թշուառութիւնները, որոնց դէմ մաքառելու անգօր է գտնւում մարդը, բնականապէս ձգում են նրան յուսահատ եւ շարեալ դրութեան մէջ: Կեանքը եւ աշխարհը դառնում է նրա համար ցաւերի եւ դառնութեան մի ծով, եւ այդ ցաւերից ազատուելու համար նա ձգում է իրան աստծու գիրկը եւ հանգստութիւն որոնում հետ գերեզմանեան խաղաղութեան մէջ: Նա մտածում է, թէ աշխարհի վերջը հասել է, եւ շտապում է թողնել նրան: Այստեղից ծագում է խորին անձնուրացութեան զգացմունքը եւ հակումն դէպի անապատ, դէպի ամայութիւն:

Եւ իրաւ, միեւնոյն տառապանքների ընթացքում, երբ թշնամին, սովը, ժանտախտը, երկրաշարժը միացած, աւերակ էին դարձնում երկիրը, հենց այդ ժամանակ զանազան տեղերում կառուցւում էին մեծ թողնել անապատներ եւ լցւում էին բազմաթիւ աշխարհից հրաժարուած արեղաներով:

Իսկ եւ իսկ այն ժամանակ, երբ պարսիկներից եւ օսմանցիներից աւերակ դարձած Հայաստանի խրճիթները դեռ միտնում էին կրակի մէջ, եւ երբ